

KANTON SARAJEVO

Skupština Kantona Zakonodavno-pravna komisija

Na osnovu člana 4. Zakona o izmjenama i dopunama Zakona o javnim priznanjima Kantona Sarajevo ("Službene novine Kantona Sarajevo", broj 36/09) i člana 172. stav 1. Poslovnika Skupštine Kantona Sarajevo ("Službene novine Kantona Sarajevo", broj 12/05 - Prečišćeni tekst i broj 7/08), Zakonodavno - pravna komisija Skupštine Kantona Sarajevo, na sjednici održanoj 28. januara 2010. godine, utvrdila je Novi prečišćeni tekst Zakona o javnim priznanjima Kantona Sarajevo.

Novi prečišćeni tekst Zakona o javnim priznanjima Kantona Sarajevo obuhvata: Zakon o javnim priznanjima Kantona Sarajevo ("Službene novine Kantona Sarajevo", broj 7/06 - Prečišćeni tekst), Zakon o izmjenama i dopunama Zakona o javnim priznanjima Kantona Sarajevo ("Službene novine Kantona Sarajevo", broj 9/06), Zakon o dopunama Zakona o javnim priznanjima Kantona Sarajevo ("Službene novine Kantona Sarajevo", broj 12/06) i Zakon o izmjenama i dopunama Zakona o javnim priznanjima Kantona Sarajevo ("Službene novine Kantona Sarajevo", broj 36/06), u kojim je naznačen dan stupanja na snagu tih zakona.

Broj 01-05-1267/10
28. januara 2010. godine
Sarajevo

Predsjedavajući
Zakonodavno-pravne komisije
Esad Hrvačić, s. r.

ZAKON

O JAVNIM PRIZNANJIMA KANTONA SARAJEVO (NOVI PREČIŠĆENI TEKST)

Član 1.

Ovim Zakonom utvrđuju se javna priznanja Kantona Sarajevo (u daljnjem tekstu: Kanton) i utvrđuju uvjeti i način dodjele javnih priznanja Kantona.

Član 2.

Javna priznanja Kantona (u daljnjem tekstu: Javno priznanje) su Počasni građanin Kantona i "Plaketa Kantona".

Javna priznanja iz prethodnog stava dodjeljuju se u obliku povelje, odnosno plakete, o čijem izgledu, na osnovu javnog konkursa, odlučuje Odbor za javna priznanja Kantona Sarajevo (u daljnjem tekstu: Odbor).

Jedinice lokalne samouprave mogu svojom odlukom utvrditi javna priznanja.

Član 3.

Inicijativu za proglašenje Počasnim građaninom Kantona, na osnovu javnog poziva, mogu podnijeti poslanici, udruženja, fondacije i pojedinci, a podnosi se Vladi Kantona i poslanicima, koji prijedlog za proglašenje Počasnog građanina Kantona upućuju Odboru.

Skupština proglašava Počasnim građaninom strane državljanke koji su se istakli naročitim zaslugama u davanju podrške pravednoj borbi za odbranu Sarajeva od agresije, unapređenju međunarodne saradnje, razvijanju međunarodnih međuljudskih odnosa, na načelima solidarnosti, demokratičnosti, humanosti i toleranciji među ljudima različite nacije, vjere, kulture i dr.

Počasnom građaninu dodjeljuje se Povelja Kantona (u daljnjem tekstu: Povelja).

Član 4.

Plaketa Kantona (u daljnjem tekstu: Plaketa) dodjeljuje se kao priznanje za doprinos razvoju Kantona u oblasti privrede, nauke, društvenih djelatnosti i umjetnosti. Plaketa se dodjeljuje pojedincima i kolektivima.

Javno priznanje iz stava 1. ovog člana može se dodijeliti i posthumno.

Plaketa se dodjeljuje svake godine.

Član 5.

Pravo predlaganja Javnog priznanja iz člana 4. ovog Zakona, imaju preduzeća, ustanove, političke organizacije, udruženja građana i drugi organi i organizacije i neposredno odbori Skupštine za dodjelu nagrada.

Član 6.

O dodjeli Javnog priznanja, iz čl. 3. i 4. ovog Zakona, odlučuje Odbor koji, na prijedlog Komisije za izbor i imenovanje i administrativna pitanja Skupštine (u daljnjem tekstu: Komisija), imenuje Skupština.

Javno priznanje iz prethodnog stava verifikuje Skupština.

Član 7.

Odbor se sastoji od predsjednika, zamjenika predsjednika i pet članova.

Mandat Odbora traje do kraja mandata poslanika Skupštine koja ga je imenovala.

Član 8.

Odbor naročito:

- utvrđuje, po potrebi, bliže kriterije za dodjeljivanje Javnog priznanja;
- obavještava javnost o načinu i roku predlaganja kandidata za Javno priznanje;
- dodjeljuje Javno priznanje;
- utvrđuje sadržaj Povelje.

Član 9.

Odbor radi u sjednicama i odlučuje većinom glasova članova Odbora.

Član 10.

Članovi Odbora imaju pravo na naknadu za svoj rad.

Visinu naknade iz prethodnog stava utvrđuje Komisija.

Član 11.

Odbor donosi poslovnik o svom radu kojim se određuje način rada Odbora, način obavještanja javnosti o radu Odbora, način i rok u kojem se podnose prijedlozi za dodjelu Javnog priznanja, rok do kojeg je Odbor dužan donijeti odluku o dodjeli Javnog priznanja, postupak obavještanja javnosti o dodijeljenim Javnim priznanjima i druga pitanja od značaja za rad Odbora, u skladu sa ovim Zakonom.

Član 12.

Javno priznanje može se opozvati ako se dobitnik pokaže nedostojnim Javnog priznanja.

Opoziv Javnog priznanja vrši se na način i po postupku za dodjelu Javnog priznanja, utvrđenom ovim Zakonom.

Član 13.

Javno priznanje Počasni građanin uručuje predsjedavajuća/ predsjedavajući Skupštine, a javno priznanje "Plaketa Kantona" uručuje premijer Kantona.

Javna priznanja iz prethodnog stava uručuju se na svečanoj sjednici Skupštine, koja se održava u periodu Dana Kantona Sarajevo.

Član 14.

Imena dobitnika Javnog priznanja objavljuju se u "Službenim novinama Kantona Sarajevo".

Član 15.

Stručne i administrativne poslove za Odbor vrši Služba za skupštinske poslove, a funkciju sekretara Odbora vrši sekretar Skupštine ili lice koje on odredi.

Član 16.

Služba za skupštinske poslove vodi evidenciju o dodijeljenim Javnim priznanjima.

Član 17.

Sredstva za provođenje ovog Zakona određuju se u Budžetu Kantona.